



Dr Muusechlapf

Text: Hans Jürg Zingg

Melodie: Hans Jürg Zingg

Begleitmusik: Roland Scherrer/Christian Schwander

Di meischten aute Grieche sy säute gschydi Sieche:
Scho dr Diogenes isch Gägner gsy vom Stress.
Halli – hallo – hallihallo Hellas!

Dr Pindar u dr Homer, di schwadere zfriden im Meer.
Dr aut Pythagoras däm isch es z chaut u z nass!
Halli hallo, däm isch es z chaut u z nass!

Euklid und Epikur, di machen e Velotour
vo Sparta uf Korinth - u aus bi Gägewind!
Halli hallo – vo Sparta uf Korinth!
Halli velo – u aus bi Gägewind!

Am Wäg steit der Aesop u macht Kentourestop.
Da chiem so ne Cheib, doch throne druff scho drei Amazone.
Uhu! Hallo! – drei feissi Amazone!

O d Götter, di antike, tüe täglech aerobic-e:
ab ihrne Schwüing u Ggümp erzittret dr Olymp!
Halli hallo, erzittret dr Olymp!

Dr Hektor u dr Paris, di gö i ds Vegetaris.
Dert hocket scho dr Plato u chöiet sy Salat o.
Halli hallo, dr Plato sy Salat o.

Zum Kreon seit d Jokaschte: „Los Brüetsch, i mues itz faschte,
süscht macht dr Ödipus ufzmau no mit mir Schluss.“
Halli hallo, ufzmau no mit mir Schluss!

Was isch das für ne Ggöiss? - Bim Zeus, dasch dr Orpheus!
Drufabe ghörsch es Quiike. – Hehe, dasch d Eurydike.
Halli hallo: e Ggöss u druuf es Quiike!
Haha hoho: Orpheus und Euridike!

Em auten Aischylos gfieu dert dä jung Matros,
hingäge Sophokles schwärmt vo re Stewardess.
Halli hallo, re Swissair-Stewardess!

Dr Vatter Odysseus rüeft lut: „Juhui, mir chöi s!“
D Muetter Penelope dänkt still: „Oweh, scho gscheh!“
Halli hallo, dänkt einisch me: „Scho gscheh!“

„Wär chunnt de dert cho z suuse? - He z tuusig, dasch my Muuse!“
So rüeft dr Äschylus u macht sech zwäg zum Kuss.
Halli hallo, u macht sech zwäg zum Kuss.

Si tüeg nid nume schmuuse, so seit di ärnschti Muuse;
zum Byspil bi dr Sappho gäbs ab und zue ne Chlapf o.
Halli hallo, da gäbs e Muusechlapf!

Bim Mische Herakles vrjättet s fasch vor Stress.
„Alls fliesst“, seit Heraklit – „wägspüele muesch dä Shit!“
Halli hallo, „Alls fliesst“, seit Heraklit!
„Aha, jäso – wägspüele muesch dä Shit!“

U hätti d Helena es Badchleid ane gha
bim Bade, hätt s – o ja – ke Chrieg ggä um Troja.
De hätts – o ja – ke Chrieg ggä um Troja!

(1983 / 87)

Die heitere Zugabe zum düsteren Ernstfall-Programm!
(Roland spielt das Schwyzerörgeli)